



PERUTUSAN

KEMENTERIAN KESIHATAN

**YANG BERHORMAT
DATO SERI SETIA DR HAJI MD ISHAM BIN
HAJI JAAFAR
MENTERI KESIHATAN
SEMPENA
SAMBUTAN HARI PENDENGARAN SEDUNIA 2026**

03 MAC 2026

**TEMA: “DARI KOMUNITI KE BILIK DARJAH: PENJAGAAN
PENDENGARAN UNTUK SEMUA KANAK-KANAK.”**

“From communities to classrooms: hearing care for all children.”

1. Setiap tahun pada 3 Mac, seluruh masyarakat dunia termasuk Negara Brunei Darussalam bersatu dalam satu tujuan yang sama iaitu untuk mengangkat kepentingan kesihatan pendengaran sebagai asas kesejahteraan insan. Hari Pendengaran Sedunia juga menekankan bahawa keupayaan untuk mendengar adalah asas kepada komunikasi, pembelajaran dan penyertaan penuh dalam kehidupan bermasyarakat.
2. Pada tahun ini, tema sambutan Hari Pendengaran Sedunia 2026 memberikan tumpuan khusus kepada kanak-kanak (generasi masa

depan negara) iaitu **“From communities to classrooms: hearing care for all children”**. Tema ini mengingatkan kita bahawa penjagaan pendengaran tidak boleh terhad kepada klinik dan hospital sahaja tetapi ianya mestilah bermula dari rumah dan diperkukuh di peringkat komuniti dengan sokongan oleh sistem kesihatan, dan seterusnya dipastikan keberkesanannya di bilik darjah. Pendekatan yang menyeluruh dan bersepadu inilah yang akan memastikan tidak ada kanak-kanak yang tercicir hanya kerana masalah pendengaran yang tidak dikesan dengan lebih awal.

3. Di peringkat global, dianggarkan seramai 90 juta kanak-kanak dan remaja hidup dengan masalah kurang pendengaran. Sebahagian besar iaitu 60% daripada keadaan ini sebenarnya boleh dicegah melalui langkah kesihatan awam yang mudah dan berkesan dari segi kos seperti mendapatkan imunisasi, pengurusan jangkitan telinga, amalan penjagaan telinga yang selamat, serta perlindungan daripada bunyi bising yang berbahaya.
4. Bagi seorang kanak-kanak, kelambatan dalam pengesanan masalah pendengaran bukan sekadar isu perubatan, tetapi ianya boleh memberi kesan kepada perkembangan bahasa, pencapaian akademik, keyakinan diri, dan seterusnya peluang masa depan mereka. Justeru itu, pengenalan awal dan intervensi tepat pada masanya bukanlah satu pilihan tetapi ianya adalah satu keperluan.
5. Di Negara Brunei Darussalam, data yang diperolehi daripada Unit Audiologi menunjukkan bahawa jumlah kanak-kanak berumur antara 0 hingga 5 tahun yang dikenal pasti mengalami masalah kurang pendengaran telah mencatatkan peningkatan yang ketara dalam tempoh lima tahun kebelakangan ini. Peningkatan tersebut adalah

sebanyak 127%, iaitu daripada 88 orang kanak-kanak pada tahun 2019 kepada 200 orang kanak-kanak pada tahun 2024. Walau bagaimanapun, meskipun bilangan kanak-kanak yang didiagnosis dengan masalah kurang pendengaran adalah tinggi, tidak semuanya melibatkan kehilangan pendengaran jenis kekal. Terdapat sebahagian kanak-kanak yang menunjukkan pemulihan pendengaran dari semasa ke semasa, sama ada secara semula jadi, melalui rawatan perubatan atau intervensi pembedahan. Bagi kanak-kanak yang didiagnosis dengan kehilangan pendengaran jenis kekal dan dikenalpasti berpotensi mendapat manfaat daripada penggunaan alat bantu pendengaran, peralatan tersebut akan dibekalkan secara percuma dengan serta merta oleh Kerajaan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam. Sejak tahun 2019 hingga 2024, sebanyak 257 unit alat bantu pendengaran telah dibekalkan kepada kanak-kanak berumur di bawah 12 tahun.

6. Selaras dengan amalan terbaik antarabangsa, Negara Brunei Darussalam telah melangkah ke hadapan dengan melaksanakan liputan sejagat Program Saringan Pendengaran Anak Damit sejak Ogos 2023. Melalui program ini, setiap anak damit berpeluang untuk menjalani saringan seawal tempoh neonatal iaitu di dalam fasa perkembangan yang paling kritikal bagi membolehkan rujukan, diagnosis dan intervensi dilaksanakan dengan segera, sekali gus mengurangkan risiko kesan jangka panjang terhadap perkembangan kanak-kanak.
7. Kementerian Kesihatan juga telah mencatat satu pencapaian klinikal yang signifikan melalui kejayaan pembedahan implan koklea secara bilateral kepada seorang anak damit berusia enam bulan, menjadikan

Negara Brunei Darussalam antara negara terawal di rantau ini yang melaksanakan intervensi tersebut pada usia yang sangat muda. Kejayaan ini bukan sekadar pencapaian teknikal, tetapi simbol komitmen negara untuk memberikan peluang terbaik kepada setiap kanak-kanak.

8. Bagi memastikan pengesanan pendengaran tidak terhenti di peringkat kelahiran sahaja, Perkhidmatan Kesihatan Sekolah dengan kerjasama Pusat Promosi Kesihatan, Kementerian Kesihatan juga melaksanakan ujian saringan pendengaran secara berkala sebagai sebahagian daripada penilaian kesihatan rutin murid di sekolah-sekolah. Pengintegrasian saringan sistematik dan program intervensi awal dalam pelan kesihatan kanak-kanak dan kesihatan sekolah adalah penting bagi memastikan hasil yang lebih baik bagi kanak-kanak yang hidup dengan masalah telinga atau kurang pendengaran, serta menyokong pembelajaran yang inklusif dan berkesan.
9. Kajian antarabangsa jelas menunjukkan bahawa intervensi awal bukan sahaja memberi manfaat klinikal, malah berkesan dari segi kos dalam jangka masa yang panjang. Pelaburan dalam saringan dan intervensi awal mengurangkan keperluan sokongan pendidikan khas yang berpanjangan, meningkatkan keupayaan komunikasi dan pembelajaran, serta menyumbang kepada hasil sosioekonomi yang lebih baik sepanjang hayat. Hal ini adalah selaras dengan strategi kesihatan awam berasaskan pencegahan serta prinsip penjagaan kesihatan berasaskan nilai (*value-based healthcare*).
10. Sempena Hari Pendengaran Sedunia 2026 ini, Kementerian Kesihatan menggalakkan penglibatan berterusan daripada ibu bapa, penjaga, pendidik dan komuniti dalam menyokong penjagaan

kesihatan pendengaran, kerana setiap kanak-kanak berhak untuk mendengar, setiap kanak-kanak berhak untuk belajar, dan setiap kanak-kanak berhak untuk mencapai potensi sepenuhnya. Marilah kita sama-sama memastikan bahawa dari komuniti hingga ke bilik darjah, penjagaan pendengaran untuk semua kanak-kanak bukan sekadar aspirasi tetapi satu realiti.

-T A M A T-